

Zakonodavcu je, prilikom donošenja Zakona o Poreznoj upravi Federacije BiH, morala biti poznata odredba člana 25. stav 3. Zakona o slobodi pristupa informacijama u Federaciji BiH, kao i odredbe člana 3. stav 1. tačka 4. Zakona o Poreznoj upravi Federacije BiH.

Zakonodavac je, prilikom donošenja Zakona o Poreznoj upravi Federacije BiH, definirao poreznu tajnu sa svrhom da izmijeni i dopuni Zakon o slobodi pristupa informacijama u Federaciji BiH.

U slučaju različitog propisivanja u vezi sa pružanjem raznih informacija, u pogledu propisanih ograničenja trebalo bi primijeniti odredbe Zakona o Poreznoj upravi Federacije BiH. ■

UPRAVNI POSTUPAK

Poravnanje stranaka

PITANJE: Kako se zaključuje poravnanje u upravnom postupku i koje su obaveze službenog lica koje vodi postupak? - pita pretplatnik iz Gradačca.

ODGOVOR: Kada u upravnom postupku učestvuju dvije ili više stranaka sa suprotnim zahtjevima, službeno lice koje vodi postupak nastoji u toku cijelog postupka da se stranke poravnaju, bilo u potpunosti ili djelimično u nekim spornim tačkama.

Poravnanje mora biti uvijek jasno i određeno i ne smije biti na štetu javnog interesa, javnog morala ili pravnog interesa trećih lica.

Poravnanje se upisuje u zapisnik, a zaključeno je kada stranke potpišu zapisnik poslije pročitanoog zapisnika o poravnanju. Poravnanje ima snagu izvršnog rješenja donešenog u upravnom postupku.

Na zahtjev stranaka službeno lice organa koji vodi postupak predočava im ovjeren prijepis zapisnika. ■

Mensur HADŽIMUSIĆ,
dipl. pravnik

Najniža bruto satnica 3,36, a najniža neto 1,95 KM

Piše:
Erna HRUSTANOVIĆ,
dipl. pravnik

Gotovo dvije godine se raspravlja na Ekonomsko-socijalnom vijeću, a po zahtjevu Saveza samostalnih sindikata Bosne i Hercegovine za usklađivanjem najniže neto, odnosno bruto satnice. Osnov za usklađivanje neto, odnosno bruto satnice Saveza sindikata Bosne i Hercegovine je našao u članu 9. Općeg kolektivnog ugovora za teritoriju Federacije Bosne i Hercegovine („Sl. novine FBiH“, broj 54/05) kojim je utvrđeno da se najniža bruto, odnosno neto satnica usklađuje sa povećanjem troškova života, rasta cijena na malo i ukupnog privrednog napretka, najmanje jednom godišnje Odlukom Vlade Federacije BiH, na osnovu usaglašenih stavova socijalnih partnera u Ekonomsko-socijalnom vijeću za teritoriju Federacije BiH.

Nije bilo osnova za povećanje u prošloj godini

Postupajući po tom zahtjevu, Vlada Federacije Bosne i Hercegovine je u julu prošle godine razmatrala Analizu troškova života u Federaciji Bosne i Hercegovine u kojoj su korišteni podaci Federalnog zavoda za statistiku, prema kojima je indeks troškova života u maju 2007. godine iznosio 101,6 što je u odnosu na prosjek prošle godine značilo povećanje za 1,6 odsto.

Kako je uvjet za povećanje najniže bruto stanice porast tro-

škova života u posljednja tri mjeseca prije donošenja Odluke, te kako se nisu bili stekli ti uvjeti za povećanje najniže bruto satnice, tada nije prihvaćen zahtjev Saveza samostalnih sindikata.

Imajući u vidu da je došlo do porasta cijena osnovnih životnih namirnica i da se najavljuje dalji porast cijena, te stalne zahtjeve Saveza samostalnih sindikata za donošenjem Odluke, Vlada Federacije BiH u januaru ove godine donijela je Zaključak da su se stekli uslovi za povećanje najniže bruto, odnosno neto satnice za 10 odsto, uz zahtjev da se o ovom povećanju ponovno raspravlja na Ekonomsko-socijalnom vijeću.

Najniža bruto plaća 504,41, a najniža neto 343,00 KM

Nakon ponovne rasprave na Ekonomsko-socijalnom vijeću (mart 2008. godine), socijalni partneri su se usaglasili da se izvr-

ši usklađivanje najniže bruto, odnosno neto satnice u predloženo iznosu, sa primjenom od 1. marta 2008. godine, te je u tom pravcu i upućen prijedlog Vladi Federacije BiH.

Tako je Vlada Federacije Bosne i Hercegovine sredinom aprila ove godine donijela Odluku da najniža bruto satnica iznosi 3,36, odnosno bruto plaća 504,41 KM, a najniža neto satnica da bude 1,95, tj. najniža neto plaća 343,00 KM. Ujedno, socijalni partneri su se usaglasili da se pokrene inicijativa za izmjene i dopune Općeg kolektivnog ugovora za teritoriju Federacije Bosne i Hercegovine. ■

Na zahtjev Saveza samostalnih sindikata Bosne i Hercegovine, nakon dvije godine, povećana bruto, odnosno neto satnica u Federaciji BiH. Socijalni partneri su se usaglasili da se pokrene inicijativa za izmjene i dopune Općeg kolektivnog ugovora za teritoriju Federacije BiH